



BOLETÍN RSU SETEMBRO 2020

UNIVERSIDADE DE VIGO.

UNIDADE DE ANÁLISIS E PROGRAMAS



REMATA O PRAZO PARA SOLICITAR AS AXUDAS DE INVESTIGACIÓN DA CÁTEDRA FEMINISMOS 4.0 DEPO-UVIGO

DUVI 03/09/2020

O 24 de xullo Universidade de Vigo e Deputación de Pontevedra renovaban a súa colaboración a través da Cátedra de Feminismos 4.0 Depo-UVigo. Un mes despois lanzábase, no marco deste acordo, unha nova [convocatoria das axudas de investigación](#) que teñen como obxectivo de fomentar o coñecemento no eido da cultura e da sociedade dixital en estudos de xénero.[+info](#).



O CURSO ARRANCARÁ COA ESTREA DUN NOVO PORTAL DE TELEDOCENCIA, MOOVI

M. DEL RÍO DUVI 04/09/2020

O 2020-2021 será un curso de moitos cambios na Universidade de Vigo froito da experiencia adquirida pola institución para adaptarse á situación de emerxencia da segunda parte do curso pasado. Unha das principais novidades, que estará dispoñible a próxima semana, é un novo portal de teledocencia que substituirá a FaiTic. Bautizado como MooVi, está baseado nunha instalación na nube da última versión dispoñible de Moodle, que é a plataforma estándar dentro das tecnoloxías de software libre no ámbito da teleensinanza.[+info](#).



O primeiro usuario da sala cardio-fitness de Vigo

REABREN AS SALAS CARDIO-FITNESS E MULTIUSOS DOS TRES CAMPUS

M. DEL RÍO DUVI 07/09/2020

Tras varios meses pechadas, as instalacións deportivas dos tres campus volven abrir as súas portas hoxe luns. En concreto, as salas cardio-fitness e as salas multiusos dos pavillóns polideportivos de Ourense e Vigo e a sala cardio-fitness do pavillón do campus de Pontevedra xa comezaron a recibir os seus primeiros usuarios e usuarias.[+info](#).



O CENTRO DE LINGUAS REFORMULA E AMPLÍA A SÚA OFERTA ACADÉMICA PARA O NOVO CURSO

D. BESADÍO DUVI 08/09/2020

O Centro de Linguas da Universidade de Vigo arranca o curso 20-21 estreando web e unha oferta académica totalmente renovada e adaptada ao contexto actual. Nesta nova programación gaña peso a oferta de actividades semipresenciais e virtuais para que así todo o alumnado poida atopar o curso que mellor se adapte aos seus horarios e intereses. A matrícula xa está aberta e as linguas ofertadas inclúen inglés, alemán, portugués, chinés, italiano, xaponés e español como lingua estranxeira.[+info.](#)



XOVES EMPREGABLES: UNHA CITA SEMANAL PARA LANZAR A CARREIRA PROFESIONAL DO ALUMNADO

M. DEL RÍO DUVI 09/09/2020

A priori, a actual situación económica derivada da pandemia da covid-19, non semella o mellor momento para comezar a busca activa de emprego. Pero como caso todas as situacións adversas, esta tamén pode supor unha oportunidade para formarse, coñecer as novas necesidades dun futuro mercado laboral da era pos-coronavirus e mellorar a formación. Con esta idea, a Área de Emprego e Emprendemento decidiu poñer en marcha os [Xoves Empregables](#), unha serie de seminarios web cunha periodicidade mensual destinados tanto a estudantes como a persoas recentemente tituladas pola Universidade de Vigo.[+info](#).



A exposición afonda na percepción cromática do alumnado do campus de Ourense

A SALA ALTERARTE ÁBRESE DE NOVO AO PÚBLICO DANDO CONTINUIDADE À MOSTRA 'TODXS SOMOS ÚNICXS'

ROSA TEDÍN DUVI OURENSE 10/09/2020

Co inminente inicio do novo curso académico 2020/2021, a Sala Alterarte do campus de Ourense volve a abrir as súas portas ao público, tanto membros da comunidade universitaria como cidadanía en xeral. Faino dando continuidade á exposición *Todxs somos únicxs*, realizada pola artista Mónica Alonso e comisariada por Miguel Anxo Rodríguez.[+info](#).



Figueroa, Soto, Blanco e López Font

O PONT-UP STORE ADÍA AS SÚAS ACTIVIDADES PRESENCIAIS, PERO MANTÉN O SEU PROGRAMA FORMATIVO VIRTUAL

DUVI PONTEVEDRA 10/09/2020

A incorporación do concello de Pontevedra dentro das zonas con especiais restricións por mor da covid-19 motivou o adiamento das diferentes actividades presenciais que estaba previsto que, entre o vindeiro xoves 17 e o sábado 19, se desenvolvesen na cidade no marco da sétima edición do [Pont-Up Store](#), o encontro do emprendemento promovido pola Vicerreitoría do campus, a través do Campus Crea, co Concello como patrocinador principal. [+info](#).



Intervención do reitor da Universidade de Vigo, Manuel Reigosa

AS UNIVERSIDADES GALEGAS DÓTANSE DE NOVOS RECURSOS PARA FOMENTAR A IGUALDADE DE XÉNERO NA DOCENCIA

D. BESADÍO DUVI 10/09/2020

Promover políticas integrais que favorezan a igualdade de xénero, o principio de Igualdade de oportunidades e a diversidade na docencia e investigación universitaria. Os tres reitores das universidades galegas presentaron este xoves once [guías docentes con perspectiva de xénero](#), editadas orixinariamente en catalán por Xarxas Vives, a asociación que reúne 22 universidades de territorios nos que se fala catalán, e que agora foron traducidas ao galego para pór a disposición da comunidade universitaria galega a través das webs de igualdade das tres institucións de ensino superior galego. [+info](#).



Acto de graduación conxunto dos tres campus o pasado curso, celebrado en Ourense

CAMBIOS DE LOCALIZACIÓN E REDUCCIÓN DE ALUMNADO POR MATERIAS, PRINCIPAIS NOVIDADES PARA O NOVO CURSO DO PROGRAMA DE MAIORES

DUVI 11/09/2020

Se hai uns meses o alumnado da Universidade miraba cara este curso con inquedanza, os estudantes sénior da Universidade de Vigo tiñan aínda máis incertezas sobre como se ía desenvolver o seu regreso ás aulas ao seren, en moitos casos, poboación de risco. Pero as medidas de seguridade e os cambios de localización van permitir que o [Programa de Maiores](#) comece, a partir do día 28 deste mes, coa docencia presencial en todos os seus niveis. [+info](#).



A OFERTA FORMATIVA DA ÁREA DE NORMALIZACIÓN LINGÜÍSTICA SERÁ ESTE CUADRIMESTRE 100% VIRTUAL

D. BESADÍO DUVI 11/09/2020

100% virtuais. Así son os cursos de formación en lingua galega do primeiro cuatrimestre do curso 2020/2021 organizados pola Área de Normalización Lingüística, unha oferta formativa que se compón este ano de seis cursos en liña totalmente gratuítos, que se van desenvolver ao longo dos meses de outubro, novembro e decembro e nos que se inclúen propostas de interese tanto para o alumnado como para o persoal docente e investigador e o de administración e servizos. A matrícula, totalmente de balde, manterase aberta ata o vindeiro día 25. [+info.](#)



Un intre do acto de benvida celebrado na Facultade de Belas Artes

A UNIVERSIDADE DÁ A BENVIDA AO SEU NOVO ALUMNADO NUN CURSO MARCADO POLA COVID-19

DUVI 14/09/2020

Unha semana antes a que dea inicio de xeito oficial o curso 2020-2021, un ano académico que virá marcado pola crise sanitaria xerada pola covid-19, as diferentes facultades e escolas da Universidade de Vigo reciben ao seu alumnado de novo ingreso. Fano a través da serie de actos benvida programados, desde este luns e ata o vindeiro mércores 23, polos diferentes centros, tanto de xeito presencial, na meirande parte dos casos, como de forma virtual. [+info.](#)



Están convocados pola Vicerreitoría de Responsabilidade Social, Internacionalización e Cooperación

A UVIGO PREMIARÁ OS MELLORES TFG E TFM SOBRE A AXENDA 2030, A COOPERACIÓN AO DESENVOLVEMENTO E A RESPONSABILIDADE SOCIAL

DUVI 14/09/2020

A Vicerreitoría de Responsabilidade Social, Internacionalización e Cooperación da Universidade de Vigo ten convocada a segunda edición dos premios ao mellor traballo fin de grao ou traballo fin de mestrado en temáticas relacionadas coa Axenda 2030, a cooperación ao desenvolvemento e a responsabilidade social corporativa no curso académico 2019/2020. A convocatoria ten como obxectivo o recoñecemento dos traballos fin de estudos realizados por alumnado da Universidade de Vigo que se distingan por ser especialmente relevantes nestas temáticas. [+info.](#)



O investigador abordou no seu relatorio os esforzos dedicados a describir os efectos de certos aditivos dos plásticos sobre os organismos mariños usando a proteómica

COMEZA A DÉCIMA EDICIÓN DO 'CAFÉ CON SAL' CO FOCO POSTO NOS EFECTOS DOS ADITIVOS PLÁSTICOS NOS PEIXES MARIÑOS USANDO A PROTEÓMICA

DUVI 15/09/2020

O programa *Café con Sal* iniciou hoxe as actividades da súa décima edición co relatorio do investigador predoutoral Alexandre Martínez Schönemann, *Efectos dos aditivos plásticos nos peixes mariños, un enfoque proteómico*. Na conferencia, ofrecida en directo a través de Campus Remoto, o investigador do equipo de Ecotoxicoloxía e Contaminación Mariña- EcoTox (Grupo Ecocost, CIM-UVigo) abordou os esforzos dedicados a describir os efectos de certos aditivos dos plásticos sobre os organismos mariños usando a proteómica sobre a especie obxecto do seu estudo. [+info](#).



Entre outubro e decembro levaranse a cabo oito obradoiros no campus

OITO OBRADOIROS PARA AMPLIAR AS OPCIÓNS FORMATIVAS DE ALUMNADO E CIDADANÍA

DUVI PONTEVEDRA 16/09/2020

Oito talleres que á vez que permiten ampliar a formación do alumnado do campus en diferentes ámbitos están tamén abertos ao conxunto da cidadanía integran o programa de obradoiros de Extensión Universitaria impulsado pola Vicerreitoría do campus para o primeiro cuadrimestre. Baixo o lema de *Novas metas!*, este programa formativo inclúe catro novas actividades, centradas na identificación de cogomelos, na elaboración de podcasts, na saúde vocal e nas dificultades que os problemas de visión poden supor para a aprendizaxe. [+info](#).



O director do Campus do Mar, Daniel Rey, e a vicerreitora de Investigación, Belén Rubio, na inauguración do seminario

ULTIMAN A PRIMEIRA PLATAFORMA EUROPEA QUE CENTRALIZARÁ TODA A OFERTA FORMATIVA E DE EMPREGO NO SECTOR MARÍTIMO-PORTUARIO

D. BESADÍO DUVI 16/09/2020

Puxéronse en marcha a comezos de ano e este mércores presentaron xa os resultados destes meses de traballo: a primeira plataforma europea sobre oferta formativa e de emprego no sector marítimo-portuario, unha ferramenta pioneira que aínda non está de todo operativa pero que o estará en breve. Falamos dos integrantes do proxecto europeo [MarENet, Atlantic Maritime Ecosystem Network](#), un consorcio de oito entidades españolas, irlandesas e francesas lideradas polo Campus do Mar. [+info](#).



Iria García estudou a gobernanza e a participación na actividade pesqueira. Imaxe do porto de Viana do Castelo

AS CONFRARIAS DE PESCADORES PRESENTANSE COMO ORGANIZACIÓNS ADECUADAS PARA A XESTIÓN INTEGRAL E SOSTIBLE DA PESCA A PEQUENA ESCALA EN GALICIA

M^a DEL CAMEN ECHEVARRÍA DUVI 17/09/2020

Gobernanza e participación na pesca a pequena escala. O caso das confrarías de pescadores en Galicia é o título da tese de doutoramento de Iria García Lorenzo, unha investigación desenvolvida ao longo de seis anos, na que a súa autora afonda na posición das confrarías dentro do sector pesqueiro a pequena escala e na actividade empresarial que realizan. “Na tese estudamos como participan na confraría os diferentes membros que conviven dentro dela...”, explica a investigadora. [+info](#).



A programación iniciárase o vindeiro luns 21 con 'Honeyland'. Imaxe: Docs del Mes

O CINEMA DOCUMENTAL VOLVE A OURENSE CO CICLO DOCS DEL MES

DUVI OURENSE 17/09/2020

Por terceiro curso académico consecutivo, o campus de Ourense, ao igual que os demais campus da UVigo, súmase á iniciativa [Docs del Mes](#), ciclo de cinema documental que ten como obxectivo achegar o cine documental ao maior número de espectadores e abrirlo a novos públicos proxectando documentais internacionais, de calidade e de temática e procedencia diversa. A programación ata finais de ano en Ourense, froito da colaboración entre a Vicerreitoría do Campus e o Cineclub de Padre Feijóo, constará nesta ocasión de catro proxeccións. [+info](#).



A programación iniciárase o vindeiro luns 21 con 'Honeyland'. Imaxe: Docs del Mes

A COVID-19 FAI VIRTUAL E “MÁIS NECESARIO QUE NUNCA” O CURSO SOBRE NEGOCIACIÓN COLECTIVA

EDUARDO MUÑIZ DUVI PONTEVEDRA 18/09/2020

A situación sanitaria xerada pola covid-19 provocou que o terceiro *Curso de negociación colectiva e individual no ámbito laboral*, que o Departamento de Dereito Público Especial da Universidade de Vigo promove xunto co Consello Galego de Relacións Laborais (CGRL) mudase o formato semipresencial de anos anteriores para dar inicio a unha edición completamente virtual. Dirixido polo catedrático de Dereito do Traballo e da Seguridade Social Jaime Cabeza e a profesora deste departamento Emma Rodríguez. [+info](#).



Participantes no coloquio virtual sobre mulleres emprendedoras

O PONT-UP STORE DETENSE NOS EFECTOS DA PANDEMIA NAS MULLERES EMPREENDEDORAS

DUVI PONTEVEDRA 18/09/2020

Como está afectando a pandemia global aos traballos das mulleres e, máis en concreto, ás mulleres emprendedoras? Esa era a pregunta á que tentaron dar resposta as participantes, na noite deste xoves, no coloquio virtual *O talento transformador das mulleres emprendedoras*, unha das actividades incluídas no programa do Pont-Up Store, o encontro do emprendemento promovido pola Vicerreitoría do campus, a través do Campus Crea, co Concello de Pontevedra, como patrocinador principal. [+info](#).



Imaxe de arquivo da anterior edición do ciclo

O CICLO DE LITERATURA INFANTIL E XUVENIL VOLVE Á PALESTRA PARA FOMENTAR LER E PENSAR “SEN TABÚS”

DUVI OURENSE 21/09/2020

A sexta edición do Ciclo de Literatura Infantil e Xuvenil que cada ano se celebra no campus de Ourense xa ten data e programación. A cita terá lugar nesta ocasión do 7 de outubro ao 4 de novembro co lema *Sen tabús: ler para pensar* e nela participarán as e os escritores Fina Casalderrey, An Alfaya, Xavier Estévez, María Canosa e o ilustrador Marcos Viso. Debido á pandemia, as conferencias pasan do formato presencial ao virtual. [+info](#).



‘Desde dentro’ pode verse desde este luns na planta baixa da facultade. Foto: Jorge Lens

UNHA EXPOSICIÓN REÚNE AS FOTOGRAFÍAS E CURTAS FEITAS NO CONFINAMENTO POLO ALUMNADO DE CCSS E DA COMUNICACIÓN

EDUARDO MUÑIZ DUVI PONTEVEDRA 21/09/2020

Dar visibilidade ao talento e a creatividade do alumnado e, á súa vez, servir como unha carta de presentación para as e os estudantes que este luns vivían o seu primeiro día na Facultade de Ciencias Sociais e da Comunicación. Estes son dous dos obxectivos que conflúen en *Desde dentro. Miradas do confinamento*, unha exposición impulsada polos profesores Jorge Lens e Paulino Pérez, que reúne na planta baixa da facultade unha selección de fotografías e vídeos que as e os estudantes dos graos en Publicidade e Relacións Públicas e Comunicación Audiovisual, respectivamente, realizaron durante o confinamento como traballos para dúas materias. [+info](#).



DOCENTES DE DEREITO DO TRABALLO ORGANIZAN UN SEMINARIO WEB SOBRE OS CAMBIOS LABORAIS XERADOS POLA COVID

D. BESADÍO DUVI 21/09/2020

Compartir co alumnado e co resto de persoas interesadas as principais novidades e desafíos do dereito laboral na era covid. Este foi o obxectivo co que os docentes da Área de Dereito do Traballo e da Seguridade Social organizaron para os vindeiros martes 22 e 29 de setembro un [seminario web](#) co que tratarán “de facer unha aproximación aos cambios que se produciron no ámbito do traballo como consecuencia da situación xerada pola pandemia.” [+info.](#)

8

O CAMPUS BUSCA NOVOS E NOVAS GALEGOFALANTES

DUVI PONTEVEDRA 22/09/2020



Jorge Soto e Alberto Oubiña, á dereita, visitaron o posto situado ante de CCSS e da Comunicación

Potenciar o uso do galego entre o alumnado do campus pontevedrés é o obxectivo central do programa [Falamos](#), impulsado pola Universidade de Vigo e o Concello de Pontevedra, que desde este martes busca darse a coñecer entre a comunidade universitaria nos postos informativos que se irán instalando diante dos diferentes centros. Un ciclo de proxeccións e coloquios sobre películas, un club de lectura, un curso de cociña e un proxecto de voluntariado lingüístico integran o programa de actividades, de carácter gratuíto, desta iniciativa, nas que é posible inscribirse tanto a través da web do programa como nos diferentes postos informativos. [+info.](#)



NACEN OS PREMIOS GIRL GEEK COVID PARA INCENTIVAR, APOIAR E FOMENTAR OS ESTUDOS STEM ENTRE AS MULLERES

DUVI 22/09/2020

Segundo o Observatorio da Igualdade da UVigo publicado este mes, as alumnas son maioría en todos os eidos do coñecemento, excepto no da enxeñaría e a arquitectura, no que representan tan só o 23% do total de estudantes matriculados. Esta infrarrepresentación pode xerar unha enorme fenda económica e salarial nun futuro no que es agarda que o 90% dos traballos van a pertencer a estes ámbitos. [+info.](#)



Imaxe de 'Lo que tú digas', de Cristian Gradín, unha das pezas que se analizará no seminario. Imaxe: Cristian Gradín

UN SEMINARIO AFONDA NO POTENCIAL DO VÍDEO PARA PERPETUAR OU COMBATER ESTEREOTIPOS DE XÉNERO

DUVI PONTEVEDRA 22/09/2020

“A televisión e, de forma máis recente, as plataformas dixitais téñense convertido en poderosas canles de perpetuación dos estereotipos de xénero, que relegaron á muller aos ámbitos da beleza e o doméstico mentres afirmaban o papel masculino nos deportes, a ciencia ou a política”. Deste xeito presenta a profesora da Facultade de Ciencias da Educación e do Deporte e investigadora do grupo Remoss Cristina Varela a problemática que constitúe o punto de partida do seminario *O vídeo como recurso didáctico en cuestións de xénero*. [+info.](#)



O investigador da Universitat d'Alacant Pablo Sánchez ofreceu un relatorio este martes

PREVENCIÓN E MITIGACIÓN DOS ESCAPES DE PEIXES NA ACUICULTURA NUNHA NOVA SESIÓN DE 'CAFÉ CON SAL'

DUVI 22/09/2020

Os eventos extremos vinculados ao cambio climático afectan, entre outros moitos sectores, ao da acuicultura mariña, especialmente por perdas de biomasa e danos nas súas instalacións. Estes escapes de peixes da acuicultura en gaiolas mariñas están considerados unha seria ameaza para a biodiversidade natural no ecosistema costeiro, pois os peixes que se escapan poden causar efectos xenéticos indesexables nas poboacións nativas a través do cruzamento, así como efectos ecolóxicos a través da depredación, a competencia e a transmisión de enfermidades aos peixes salvaxes. [+info.](#)




Este debate virtual permitiu dar a coñecer algunha das actividades do Green Campus

O GREEN CAMPUS PRESENTASE NUN FORO INTERNACIONAL SOBRE UNIVERSIDADES SUSTENTABLES

EDUARDO MUÑOZ DUVI PONTEVEDRA 23/09/2020

O papel das universidades na promoción da sustentabilidade foi un dos eixos temáticos da [XXVI asemblea xeral do Grupo Compostela de Universidades](#), para o que unha das experiencias seleccionadas foi a do programa Green Campus do campus pontevedrés. O evento organizado por medios telemáticos pola Universidade de Minho, completouse cun debate sobre universidades sustentables e outro sobre o impacto da covid-19 nas institucións de ensino superior. [+info.](#)



O proxecto celebra nestes días por medios virtuais a súa xuntanza de inicio

ESPECIALISTAS DE 17 PAÍSES BUSCARÁN SOLUCIÓNS BASEADAS NA NATUREZA AOS EFECTOS DO CAMBIO CLIMÁTICO NOS ECOSISTEMAS MARIÑOS

EDUARDO MUÑIZ DUVI 24/09/2020

32 institucións de 17 países, entre as que se atopa a Universidade de Vigo, participan no proxecto europeo *FutureMARES*, que ten como obxectivo o desenvolvemento de accións, estratexias e solucións baseadas na natureza, dirixidas a mitigar os efectos do cambio climático nos ecosistemas mariños. Financiado con máis de 8 millóns de euros polo programa Horizonte 2020 da Unión Europea, a institución viguesa está representada polo grupo [Future Oceans Lab](#), do Centro de Investigación Mariña (CIM-UVigo) neste proxecto liderado polo profesor da Universidade de Hamburgo Myriom Peck. [+info](#).

10



O ALUMNADO DO CAMPUS ABRIRÁ NOVOS CINEMAS CON CURTAS EN PRIMEIRA PERSOA

DUVI PONTEVEDRA 24/09/2020

Un ano máis, o alumnado do campus pontevedrés será un dos protagonistas da xornada inaugural do festival [Novos Cinemas](#), na que se proxectarán as curtas resultantes do obradoiro *O ceo a medio facer*, no que o director Eloy Domínguez Serén guiará a dez alumnos e alumnas na creación dunhas pezas xurdidas do achegamento ao “cinema en primeira persoa”. Ata o 30 de setembro permanece aberto o prazo de presentación de candidaturas para participar neste obradoiro promovido pola Vicerreitoría do campus e inserido no programa formativo *#Aula* do festival. [+info](#).



A primeira sesión está a desenvolverse este mes en Gondomar

A COVID-19 NON FREA AS MAREAS DO COÑECEMENTO

DUVI 24/09/2020

En grupos máis pequenos para manter a distancia de seguridade e con todas as medidas sanitarias vixentes, as Mareas do Coñecemento volven co inicio do curso académico. A pandemia da covid-19 non foi quen de frear este programa itinerante de formación para maiores de 50, que arrancou a pasada semana en Gondomar deixando unha lista de agarda tan ampla como a de persoas inscritas. E é que as e os maiores amosan, unha vez máis, que as ansias de coñecemento e experiencias non saben de barreiras de idade. [+info](#).



Imaxe da última edición

'EXPOUNIVERSITAS' CONVIDA A ALUMNADO E PROFESORADO A PRESENTAR E VALORIZAR OS SEUS PROXECTOS DE INNOVACIÓN E INVESTIGACIÓN

DUVI OURENSE 28/09/2020

Cada ano a Facultade de Educación e Traballo Social do campus de Ourense acolle a celebración de Expouniversitas. Forum de Innovación e Investigación Educativa. A edición deste curso académico, que terá lugar o 5 de febreiro de 2021, mesturará por primeira vez sesións presenciais e virtuais. Desde a súa organización convidan xa a profesorado e alumnado dos tres campus da UVigo a que na planificación que están a realizar deste cuadrimestre teñan en conta esta cita e se animen a presentar nela os seus traballos de innovación e investigación feitos nas aulas. [+info](#).



PROPOSTAS ECOFEMINISTAS EN TEMPOS DE CRISIS CIVILIZATORIA

DUVI 28/09/2020

Situar o mantemento de todas as formas de vida como prioridade absoluta da política e da economía. Esta é a principal tese que este luns defendeu ante a comunidade universitaria Yayo Herrera, antropóloga, enxeñeira, profesora universitaria, activista e unha das máximas representantes a nivel europeo do denominado eco-feminismo. Fíxoo nunha conferencia virtual retransmitida a través do Campus Remoto e que se encargou de presentar o profesor Joaquín Sueiro, director do Departamento de Lingua Española, que, en nome da comunidade educativa da Universidade de Vigo en xeral, e da Facultade de Filoloxía e Tradución en particular, lle agradeceu a súa charla. [+info](#).



IDENTIFICACIÓN PRÁCTICA DE COGOMELOS • ILUSTRACIÓN CREATIVA
INICIACIÓN AO MUNDO MAKER • NOVAS TECNOLOXÍAS NA
CONTRATACIÓN PÚBLICA • POÉTICA DO ROCK • COSMÉTICA NATURAL
PROVEITANDO A CONTORNA • AGRICULTURA ORGÁNICA • OBRADOIRO
ÁSICO DE UKELELE • INICIACIÓN AO TEATRO • AULA DE MÚSICA
AILE TRADICIONAL GALEGO

ILUSTRACIÓN CREATIVA E NOVAS TECNOLOXÍAS NA CONTRATACIÓN PÚBLICA, NOVIDADES DOS OBRADOIROS DO PRIMEIRO CUADRIMESTRE

DUVI 29/09/2020

A formación complementaria da comunidade universitaria tamén regresa á normalidade co inicio deste novo curso. Os obradoiros de Extensión Universitaria manteñen a súa tradicional programación cuadrimestral cunha oferta de dez talleres, a maioría deles de carácter presencial, que abordarán eidos como a agricultura ecolóxica, a música ou o teatro. [+info](#).



A xornada celebrarase os días 1 e 2 de outubro a través de Campus Remoto

CCXX E DO TRABALLO ORGANIZA UNHA XORNADA PARA AFONDAR NOS DEREITOS DE CONCILIACIÓN DA VIDA LABORAL E FAMILIAR TRAS A REFORMA DE 2019

DUVI 29/09/2020

Co obxectivo de analizar as novas regulacións da conciliación da vida laboral e familiar, dende unha perspectiva laboral e de Seguridade Social, a Facultade de Ciencias Xurídicas e do Traballo acollerá os días 1 e 2 de outubro a xornada en liña *Verdadeira corresponsabilidade? Os dereitos de conciliación da vida laboral e familiar despois da reforma de 2019*. [+info.](#)

12



De pé, Fina Casal, Carmela Silva e a docente Diana Durán

O CURSO DE ESPAÑOL PARA INMIGRANTES AXUDOU A 55 PERSOAS NA SÚA “LOITA POLA INTEGRACIÓN”

DUVI 30/09/2020

Para poder solicitar a nacionalidade española, as persoas non hispanofalantes deben ter superado a proba DELE A2 que realiza o Instituto Cervantes e acredita o seu dominio do idioma. Pero o custo económico da preparación previa e das taxas do exame dificultan o acceso a este proceso a algúns colectivos con menos recursos. Para tender unha ponte que permita a esas persoas “loitar pola súa integración”, a Deputación de Pontevedra leva xa catro anos organizando un curso de español para inmigrantes, que imparten docentes do Centro de Linguas da Universidade de Vigo. [+info.](#)

UNIVERSIDADE DE VIGO

Unidade de Análisis e Programas.

Edificio Filomena Dato.

Planta Baixa.

36310 Vigo (Pontevedra)

986.818.689 986.818.640

